

# Las schameals ân uss egn num

Las pûnts schameals da Conzett an la Veiamala survignan egn num rumantsch

■ (cp) A caschùn da la 116avla avertura da la tgavorgia da la Veiamala en vagnidas batageadas las pûnts schumblers projectadas da Jürg Conzett. «Pûnts da tgavorgia» e lur num rumantsch. Igl e gest scurieu egn on ca las duas pûnts da Conzett en vagnidas aviertas pigls visitaders da la tgavorgia da las Veiamalas. D'alura annà incantescha quell'atracciùn agl cor da que monumaint natiral igls giasts da tut igl mund. Cun egna pintga festivitàt en ellas vagnidas batageadas digls rapreschantants da

vaschinadi a turissem cuagl num: «Pûnts da tgavorgia».

**Spinusa tscheartga d'egn num adato**  
Aschi sempel e'gl betga sto da catar en num andant. Duas pûnts existentas da Conzett portan gea nums funsils – la Pûnt da Traversina a la Pûnt da Suransuns. Egn num funsil dat igl betg agl conturn da las pûnts schameals amiez la tgavorgia. A da las numnar simplameing «Pûnts da Conzett» pareva betg adato. Plenavànt veva Jürg Conzett scunzaglieu da far quegl. Da numnar pûnts cuagl num digl inschignier segi betg usito. Cumbagn c'igl dat duas exepziùns la «Pûnt da Wildener» a las «Pûnts da Premoli». A la tscheartga d'egn num adato e'gl dalunga sto cler ca quel vegi dad cesser an rumantsch sutsilvan par mussar la relaziùn cuagl liac noua c'ellas statan. Las variantas pussevas en vagnidas evaluadas da cuminanza cun la Leia Rumantscha ad a la fegn e'gl resto duas propostas: «Pûnts soras» a «Pûnts da tgavorgia».

## Scartira speziala par agid da pronunzgear

La giuria e dalunga stada paregna ca «Pûnts da tgavorgia» vegi egn tûn ple elegant a melodius a segi parquegl da favurisar. Mo ign veva dubis ca que num posi vagnir pronunzgieu andreg da betga Rumantschs. Tutegna ân ign sadezidieu par que «gezalieungas». La LR à proponieu da scriver sper «Pûnts da tgavorgia» ear an scartira fonetica «Pûntß da éavorgia». Cun quegl en siros tant igl num rumantsch sco ear la sia pronunzgia. Sen la tavla e' ear anc translato an divers lungatgs easters.



Thomas Rüegg a Curdin Capaul digl cunzegl d'administraziun Viamalainfra svelan la tavla cuagl num rumantsch da las pûnts schumblers an la Veiamala: «Pûnts da tgavorgia».



Igls patrùns da la sozietad da manaschi da la tgavorgia Veiamala, Thomas Rüegg a Curdin Capaul, stgazan aua ord digl Ragn par batagear las pûnts.

Cun egn schuf aua ord digl Ragn posteriur vignan batageadas las pûnts schumblers an la tgavorgia da la Veiamala cuagl num rumantsch: «Pûnts da tgavorgia».

FOTOS MAD



# Igl slalom paralel ca davainta egn legher loto

DA STEFAN A. MÜHLEMANN

■ La sonda da Pastgas, igls 31 da marz ear'igl an tut 116 skiünzas a skiünzs c'earan pronts da samasir sen la pista a val ainta Spleia. Dantant l'ora à impedieu da far las cursas, mo la cuminanza e vagnida tgirada tutegna. Las tres uniùns, igl Club da skis da Spleia, l'Uniùn da sport Tumpriv da Schons ad igl Sci Club da San Bernardegn – sustanieu da Sport Grischùn – vevan organiso da cuminanza egn slalom paralel. Suainter c'igl à gieu liac me egn'eanda avànt igl sprint da biatlon füss sto previeu par sonda passada da saduellar segls skis, da tgirar la bùna cumpagneia trànter igls cumembers da las uniùns sportivas ad anfirmir igls contacts cuagl giasts sper la cumpetiziùn sportiva. La prognosa da l'ora e stada malfrànca, ad igl à alura pro-

pi antschiè a never leavameing. Mo a Spleia e'gl savens ascheia ca l'ora e miglra c'anunzgeada. Dantant navev'igl gea scrotas grossas. Tutegna ân igls raspunsavels da la cursa samess cun curascha a la lavur a las ovg. Davent da las 08.30 e'gl vagnieu repartgieu numbras da partenza ad igl vagneva registro igls partizipants sportans.

Me cun la cursa e'gl alura tutegna sto nut. Tant la pista a val sco ear la pista da muntogna earan davantadas megna lomas da parcurer. Cun quegl füss igl prieve d'acizidaint sto megna grànd. A las nov ân igls manaders dezidieu da disgir la cursa.

Tge ussa? e stada l'amparada. Den tuts igls cumpetitors puspe turnar a tgea sainza aver fatg lur duels sen skis? Na, e stada la rasposta digls organisaturs. Els ân simplameing mido igl plan program previeu

pi gl: A las 11.30 e vagnida sarvida la gustusa spaghetada a da l'egna à antschiè la divertevla feasta da loto. Numerus sponsurs davent da Mesoc antoca Tusàn ân demonstrò da maniera impressiunanta lur sustegn par las uniùns digl sport da skis da davains las Veiasmalas: Igl e vagnieu preschanto d'aried premis natirals an la sala plagna giasts a sportists giuvens a ple passos.

Anstagl da quater cursas e'gl ussa vagnieu absolvieu quater rundas da loto an tudestg a taliàn antoca la fegn da l'ocurrenza a las quater. Par blears sportists da nev à la disfurtuna da l'ora purto fortuna agl loto, a quegl gest curt avànt Pastgas. Ascheia par exaimpel Michele Santschi da Sur, igl giuven curider da l'Uniùn da sport Tumpriv c' à fatg egn tarment sagl digl plascher cur c'el à gudagnieu egn digls premis prinzipals, egn pèr skis da slalom gigant raschaint novs. L'ora disfavorevra à betga schmaso la bùna atmosfera da la santupada.

Digl rest, igl e anc adigna nev avunda ainta Spleia par far beals turs cuagl skis near rundas da cursa lùnga. Tutegna vard'ign gea anviers la parmavera: Igl Club da skis Tambo Spleia vevan a preschantar an cunlavrur cun l'Arena da biatlon da Lai egn parcurs da biatlon a caschùn digl «Gi digl sport grischùn» c' à liac la dumeingia digls 29 d'avregl 2018 a Tusàn. Igl sara anc diversas otras uniùns sportivas da la regiùn ca vignan a preschantar lur activitads cun quella caschùn.

Ulteriuras infurmaziùns partutgànt igl «Gi digl sport grischùn» tgat'ign sut <https://www.graubuenden.ch/de/veranstaltung/tag-des-buendner-sports>

# Igls confirmànds d'Andeer



La cunfermaziùn ad Andeer à gieu liac la dumeingia da Palmas. La fotografiaia preschainta mussa igls confirmànds a lur pardicànt: Alexander Stoffel dad Avras; ser Jens Köhre; Nicola Mani da Pignia, Monika Menn da Juf a Luka Silling d'Andeer (da san.).



Igl manader a parsura da l'Uniùn da sport Tumpriv, Gieri-Christ Fravi, an bùna cumpagneia a feavra da loto.

MAD